

**Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara: Naartunermi, erninermi meeravissartaarnermilu sulingiffeqartarnek pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19 ini, sionratigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens NapãtôK', Naleraq)

### **Siullermeerneqarnera**

Naleqqamiit Jens NapãtôK' siunnersuummut pisarialimmut qujaffigaatsigit.

Naleqqamiit apeqquseqqavarput naartunermi, erninermi meeravissartaarnermilu sulingiffeqartarnek ullumikkut inatsisit atuuttut pillugit meeqqanut naligiinngisitsinermik atuutsitsineq ersarissaq sooq sulii aqqinneqarsimannginnersoq. Aaqqiiniarta, aaqqiineq nukiuvoq.

Naleqqamiit akuerisinnaangilarput pissutsit taama ittut iliuuseqarfiginagit isiginngitsuusaaginnassagutsigit. Iliuuseqarniarta, iliuuseqarneq nukiuvoq.

Una siunnersuut atuutsinneqalernissaa pisariaqartuuvoq, pissutigalugu inuiaqatigiinni naligiinnginnermi periuseqartoqartoq ersarimmat, minnerunngitsumik meeqqanut tunngatillugu. Naligiisitsiniarta, naligiisitsineq nukiuvoq.

Sooruna aaqqeeqqusisugut, sooruna iliuuseqaqqusisugut aamma sooruna naligiisitsiartugut, pissutigalugu ullumikkut inatsisit atuuttut misissoraanni maluginiagassaasooq tassaavoq, meeqqap pisinnaatitaaffiitut ilaatigut naapertuutinnimmata.

Angajoqqaat isertitaat tunngavigalugit, meeqqat assigiinngitsumik naleqartinneqarlutik inissisimapput. Taamaattoqartussaangilaq.

Meeqqap inuunermini qanoq aallartinnera tassaavoq meeqqap inuuneranut tunngavissaq, ingammik ukiut siulliit marluk ingerlaneranni.

Inuunermik aallartitsineq meeqqamut nammineersinnaangitsumut toqqissisimanartuusussaavoq, pitsaasumillu aallartinnissaa inuiaqatigiinnut tamanut pingaaruteqartuaannartussaalluni. Inoorlaat tamarmik inuunerat aallartittarpoq naligiimmik, kisianni systemip sukkanerpaaq atorlugu naligiikkunnaarsittarpai angajoqqaat aningaasaqarnerat apeqqutaalertarmat, naartunermi, erninermi meeravissartaarnermilu sulingiffeqarnermi ullormuusiaat inatsit malillugu apeqqutaatinneqalertarami, taakkulu naligiinneqqaat.

Naligiinneq meeqqap meeraanera tamaat atuuttussaagaluarpoq meeqqap pisinnaatitaaffii malikkaanni. Tamanna pisinnaangippat taava Naleqqamiit uunga siunnersuummut tunngatillugu pingaartipparput meeqqap inuunerata aallartiffiani akisussaasut anigaasat tungaatigut naligiimmik sulingiffeqartitaasalernissaat, meeqqammi pineqarput, meeqqap inuunermini aallartiffiani naligiinngisitsisoqassanngittoq Naleqqamiit pingaartipparput.

Meeqqat pisinnaatitaaffii pillugit Naalagaaffiit Peqatigiit isumaqatigiissutaata malinneqarnissaanut iliuusissatut pilersaarut 2023-2030-mut atuuttoq, Naalackersuisut iliuusissatut pilersaarutigaat. 2022-mi atsiorneqartoq.

Siulittaasoq issuaalaarpunga?

Issuaaneq aallartippoq:

*“Pitsaasumik toqqissisimanartumillu peroriartorneq inuusuttuunermi inersimasuunermilu pitsaasumik inuuneqarnissamut tunngaviliivoq. Meeqqanut tamanut tamanna pisussaaffigaarput. Meeqqat pitsaasumik toqqissisimanartumillu peroriartussapput sumi peroriartorneq, ilaquuttat kikkuuneri inuunermilu atugassarititaasut suuneri apeqqutaatinngit. Tamanna takorluugaraarput!”*

issuaaneq naavoq.

Allaqqavoq, peroriartorneq qanoq inuuneqarnissamut tunngaviliisartoq. Aamma suli qupperneq tassani ilaatigut allaqqasoqarpoq, issuaaqilaarpunga?

Issuaaneq aallartippoq:

*“Periarfissaqanngippata meeqqat ilaquutaallu pitsaasumik toqqissisimanartumillu peroriartornissamut toqqissisimanartumik atugassaqalernissaannut ikiussavagut”*

issuaaneq naavoq.

Allaqqavoq periarfissaqanngimmata ikiorneqassasut.

Aamma aajuna

issuaaneq aallartippoq

*“Angajoqqaatut, ikinngutitut, inuiaqatigiittut qinikkatullu akisussaaffeqarpugut.”*

Issuaaneq naavoq.

Allaqqavoq qinikkatut akisussaaffeqartugut.

Tassa pilersaarummi uani Naalackersuisut takorloorlugu anguniagaanni ilaatigut siulequtaani ersareqqissaartumik allaqqasut qupperneq 7-mi taama allaqqapput. Kusanartumik

takorluugaannartut allaqqaannaratik takussutissiaannaaganilu ilaatigut aamma  
allaqqasoqarpoq imatut

issuaaneq aallartippoq:

*“Pitsaanagerusumik iliuuseqarsinnaavugut”*

issuaaneq naavoq,

qujanarpoq taamatut aamma allaqqasoqartoq imaallaat takorluugaannaanerusutut  
isigisaanera iliuuseqarsinnaaninngorpoq.

Tassa siunnersuut una meeqqat inuunerminni aallarnerfianni siunissamut pitsaanagerusumik  
peroriartornissaannut iliuuseqarnissamut tunngavileeqataasussaavoq. Taamaammat  
pingaaruteqartuuvoq kinguarsarneqaqqiganilu utaqqiseqqittariaqanngittoq,  
massakkoqqissaaq meeqqanut pisariaqartuummammi.

Inatsit ullumikkut atuuttumut aningaasarsiakkaanerusut meeqqaminnut pitsaanagerusumik  
periarfissiivoq, pissakinnerusut meeqqaminnut annikinnerusunik periarfissiilluni, meeqqap  
pisinnaatitaaffii eqqarsaatigalugit naligiittoqanngilaq. Ajortoqarpoq.

Taamaammat Naleqqamiit oqaatigissavarput, meeqqat akornanni assigiinngisitsineq  
ullumikkut ersareqqissaartumik piuvoq, tamanna inuiaqatigiinnut naapertuutinngilaq.

Tamanna aqqittariaqarpoq, meeqqap atugarissaarnera angajoqqaavisa qanoq  
aningaasarsiaqarnerannik aalajangerneqartariaqanngilaq.

Naalackersuisut iliuusissatut pilersaarutaanni, MIO-mi, meeqqap pisinnaatitaaffii pillugit  
isumaqatigiisummi, allaat aamma Naartunermi, erninermi meeravissartaarnermilu  
sulinnigiffeqartarneq pillugu Inatsisartut inatsisaanni, taakkunani ataatsimut meeqqat  
oqariartorfigineqarput ilaatigut makkuusunik:

- Meeqqat atugaat pitsanngorsarneqassapput
- Meeqqat illersorneqassapput
- Meeqqat toqqissisimanartumik peroriartornissaat qulakkeerneqassaaq.

Naleqqamiit oqarusuppugut, meeqqat tamarmik assigiimmik naleqarput, taamaammat  
aamma assigiimmik aallartiffeqartariaqarput.

Anaanaasut tamarmik, siornatigut suliffigisimasaat apeqqutaatinngu sapaatip akunneranut  
akunnernik 40-nik, sapaatit akunnerini 19-ini assigiimmik ullormusiaqartinneqarnissaat  
Naleqqamiit taperserparput, isumaqaratta tamanna naligiinnerusumik aqqiinerussasoq  
aamma ilaqutariinnut toqqissisimanermik pilersitsissasoq kiisalu meeqqamut  
pitsaanerpaamik aallartitsinissamut pitsaasuusoq.

Naalackersuisut akissuteqaataanni takusinnaavara siunnersuutip siunertaa  
isumaqatigineqartoq kisiannilu massakut iliuuseqarniannigillat  
misissueqqaassagaminngooq.



Naleqqamiit tamanna pillugu Naalakkersuisut oqarfigerusuppavut imaattunik: Meeqqat utaqqisinnaanngillat, ilaqtariit utaqqisinnaanngillat, meeqqanut naligiinngisitsineq piaarnerpaamik unittariaqarpoq.

Naleqqamiit akuerinngilarput isaasalerlugu imatut nipilimmik Naalakkersuisut oqaannarnerat – “ajornartorsiut ilisimavarput misissueqqaarluta kingusinnerusukkut aatsaat aaqqijumaarpugut” – akissutit taamatut nipillit inuiaqatigiinnut naammaginangillat.

Ilaatigut tusartikkusutara pingaarneq tassaavoq: Meeqqap inuunermini pitsaasumik aallartinnera kingusinnerusukkut inuiaqatigiinnut iluaqutaasussaavoq, taamaamat isumaqarpunga aningaasat meeqqanut atorneqartut aningaasartuutaannaasussaangillat inuiaqatigiinnilu siunissamut aningaasaliinerusussaapput.

Taamatut oqaaseqarsinnarlunga Naleqqamiit piumasaraarput:

Meeqqat salliunneqassapput, oqaatsitigut pinnani, piviusunngortitsinissarlu pillugu.

Naligiinneq atuutsinneqartariaqarpoq, assigiinngisitsineq atorunnaarlugu.

Iliuseqarneq aallartinneqarli, maannakkut, kingusinnerusukkut pinnani, kinguarsaqqinnagu.

Naggataatigut oqaatigerusuppara una: Siunissami inuiaqatigiit qanoq ittuunersut takuneqarsinnaavoq ullutsinni meerartatta qanoq atugassaqartinneqarnerisigut.

Naleraqqamiit toqqarparput naligiinneq atorlugu inunngornermiit inuuneq aallartinneqartarnissaa.

Taama oqaaseqarluta siunnersuut taparserparput aamma ilaqtariinnermut Peqqisutsimullu Ataatiimiitaliamut ingerlateqqillutigu. Ataatsimiitimiitaliamittut sulilluarnissaanni kissaappakka.

Qujanaq.